

dorste alstu toe der grueten des engels  
 voertbrachtest dat guede woert Die  
 een deerne des heren my gheschee nae  
 dinen woerde Ende du heueste sijn  
 herte droncken ghemaket alsoe dat  
 hie sede Het synt mine welden toe  
 wesen mytten kinderen der mensche  
 O moeder der suetich<sup>t</sup> ende der barm-  
 hertich<sup>t</sup> alle rechtueerdighe siele in  
 moet groetmaken die salich<sup>t</sup> dijns  
 herten daer onse heil van is voert  
 ghecomen Alle tonghe der goddien-  
 stigher menschen moet dy louē **A**n

Dit ghebeth les myt nedergheslage  
 lichame opter eerden deuotelike

**O**oe den voeten dijner hillich<sup>t</sup>  
 neder valle ick o suete moe-  
 der **M**aria myt nederslaghen ende  
 oetmoedighen lichame. ende bidde  
 dattu my wilste leren wat ick dy  
 sal bidn dattu ghenoechlick is toe-  
 horen ende dinen soene toe v<sup>h</sup>oren